

東
華
續
錄

東華續錄

臣周澐著恭校

嘉慶十七年壬申春正月乙亥朔以歲前疊逢瑞雪賚親王郡王等銀有差加慶桂董誥太保溫承惠太子少保在京官員及年班來京之蒙古王公各一級並賞八旗兵丁半月錢糧○癸巳諭陽春等奏廓爾喀國王稟懇仍照向例專遣噶箕頭目進京呈進表貢一摺廓爾喀國王向例每屆五年差噶箕頭目進京呈進表貢一次嗣於嘉慶七年經朕俯念該國王年幼辦事需人曲加體恤止令將表貢敬謹送至交界由內地派員接收俟該國王能經理國事時再遵照定例遣派貢使來京本年係該國例貢之期據該國王稟懇請仍照定例專遣貢使赴京情詞極爲恭順著准其遣

噶箕頭目來京呈進表貢陽春等接奉諭旨卽傳諭該國王並計
算日期令該貢使到藏派員護送起程於本年封印前後到京隨
班瞻觀○丙申諭御史陳超會奏本年三月舉行大閱典禮各省
營伍請降旨通行一體整飭一摺國家設立兵制原應勤加訓練
其直省遇應行簡閱之年或差在京大臣或交本省督撫兵部請
旨遵行著有成例本年朕舉行大閱典禮各省查閱營伍自有一
定限期無庸因此議加整飭惟是朕召見來京陛見之提鎮大員
詢及外省操閱營伍情形多稱每年春秋兩季時加操演冬夏則
恐妨農務所言殊未覈實古者寓兵於農是以蒐苗獮狩皆於農
隙以講武事今則兵與農分入營充伍者月支糧餉本無事於南
畝卽勤加簡校並無妨礙嗣後各直省督撫提鎮有統轄營伍之
責者著不必拘定春秋之期於所屬弁兵不時訓練務令技藝精

嫺有勇知方以簡軍實而嚴武備○己亥改陝西西甯道仍爲滿漢兼用缺

二月中辰朔 上御經筵○己酉 御試翰林詹事等官擢徐頌

等四員爲一等餘升黜留館有差○癸丑諭晉昌奏稱已革知縣

陳寅之子陳榮禮呈請代父在戍當差一摺陳寅前在廣東英德

縣任內於應訊案件遲延拖累監斃人證四十餘名彼時不行擬

抵僅枷號三月發往伊犁充當苦差已屬寬典迨三年期滿時曾

經前任將軍松筠具奏特降諭旨將該犯永遠不准贖罪亦不准

釋回卽係遇赦不赦之犯今伊子陳榮禮以伊父年逾七十老病

衰頹呈請代父遠戍當差係屬人子私情晉昌自應遵照前旨卽

行駁斥若以陳寅年老可憫甯不思因彼監斃之四十餘名獨非

民命乎晉昌此奏實屬舛誤著交部議處陳寅永遠不准釋回其

子陳榮禮無庸置議○以蘇冲阿爲內閣學士

由副都統遷

書明阿爲

左副都御史

由通政使遷

○己未調胡長齡爲禮部左侍郎戴聯奎爲

兵部右侍郎○王戊諭據閱兵大臣等奏稱派出交衝之管理健

銳營副都統縣齡松齡均不能馳馬等語本日召見松齡詢及據

稱不能馳馬是實馬步箭乃滿洲舊業豈可荒廢縣齡松齡皆係

管兵之人不能馳馬豈能訓練兵丁實屬無用縣齡松齡均著不

必管理健銳營並革去副都統加恩仍准在散秩大臣上行走向

例大閱應派巴圖魯侍衛交衝著御前大臣將御前乾清門侍衛

繕寫綠頭牌進呈候朕簡派八員充當交衝差使○命副都御史

書明阿改名書敏○丙寅予新疆駐防八旗兵屯種田二萬畝有

奇以資養贍○庚午諭軍機大臣等閩省自前年辦理降匪之後

洋面已就肅清近日復有零星土匪駛竄各洋屢見奏報見據武

隆阿等奏有漳泉土盜竄臺伺劫並據稱該鎮等差役齎遷奏招舟行至東旋洋面有被盜劫失招匪之事可見該省洋匪仍未淨盡近年粵省舟師巡緝嚴密洋面土盜不敢停留粵界而閩省洋面仍劫掠頻聞是閩省水師緝捕懈弛遠不及粵省不可不速加整飭著傳諭汪志伊等嚴飭水師各將弁分探盜蹤認真搜緝悉數殄除務令海氛永靖儻日久疏懈致匪船勾結成幫辦理又形棘手則該督等不能辭養癰之咎也

三月癸酉朔兩江總督百齡等奏李家樓大工合龍河歸故道得旨獎賚下部優敘賞河道總督陳鳳翔三品頂帶仍下部議敘在工出力員弁升賞有差○乙亥 上親耕藉田○丙子 上辟鑾謁 東陵○免經過地方額賦十分之三○辛巳 上謁 昭西

陵 孝陵

孝東陵 景陵

裕陵回鑾○甲申諭軍機大臣等

陽春等奏接據哲孟雄部長來稟想將唐古特莊子賞給一所俾資居住並求差派漢番官員前往分斷界址經伊等嚴行駁斥並飭帕克哩營官等豫爲防範不令偷越等語所辦甚是哲孟雄部落並非藏屬因畏懼廓爾喀侵欺又慮日後不能保守疆土稟求在唐古特居住伊見在尙存日呢杵岡多二處地方非比失土無歸輒豫爲營窟之計妄希賞給藏屬莊子邊外部落甚多若因強鄰侵侮俱紛紛效尤乞賞地方則藏內疆域豈能徧爲容納至外番犬牙相錯各守地界亦不能差派官員一一代爲清釐界址著傳諭瑚圖禮等此次哲孟雄部長既經駁斥之後或仍懷貪圖再行滇稟並以後邊外各部落有似此妄生希冀飾詞稟求者俱當嚴詞檄諭絕其妄想一而嚴飭邊界營官加意巡防毋致偷越爲要○戊子復建陝西甯陝應舊城移駐廳治○己丑 上幸南苑

行圍○庚寅諭前據陽春等奏布魯克巴頭人等因貨物進關漏稅經帕克哩營官查詰有策忍敦柱輒同跟役郭結卜瓊等將正副營官揪毆經伊等訊供將該頭人等問擬斬梟斬決具奏部議上時業經降旨發往旋又據陽春等奏到接據布魯克巴部長來稟稱營官先持刀向戮該番民始行抵格請免治罪因查陽春等初次奏摺並未將營官持刀一節聲敘似有意偏袒營官辦理不公隨又特降諭旨由五百里發去令瑚圖禮等再行詳查起釐根由其策忍敦柱等三人暫緩辦理本日召見松筠諭及此事據松筠奏向來布魯克巴進藏貨物例不上稅節經禁革有案並稱營官等均係唐古特充當向來外夷人等與邊地營官及唐古特等鬪毆致斃均依各部落土俗治罪並准收贖罰付死者之家等語此案陽春等所奏策忍敦柱等逞兇治罪根由係因漏稅而起若

向來既不收稅豈能加以漏稅之咎竟是該營官等勒索墜雙陽
春等不將營官滋事之處據實查辦以服輿情轉稱該頭人抗稅
起釁且彼時既據跟役幹扎喜有營官先用刀向戮之供摺內全
不敘入其檄諭該部長文內亦不敘明以致該部長具稟申辨再
營官被毆之傷亦未驗明輕重案內緊要情節伊等均一味含糊
不加詳訊顯係偏聽枉斷案情多不確實至外夷與唐古特鬪毆
之案既有舊例可循伊等又何以不行查明輒將策忍敦柱等三
人問擬重辟陽春慶惠二人辦理此事欺隱外謬糊塗不堪厥咎
甚重著交部嚴加議處卽來京聽候部議尋革職○壬辰 上御
晾鷹臺大閱八旗官兵○丙申 上還京師○庚子前任山東按
察使張彤以親老乞終養允之加賞 御書扁額福字○以章煦
爲刑部左侍郎朱理爲江蘇巡撫

由刑部
吏部

夏四月甲辰諭軍機大臣等八旗生齒日繁雖經添設養育兵額仍未周普朕宵旰籌思無時或釋因思東三省係國家根本之地而吉林土膏沃衍地廣人稀聞近來柳條邊外採獲山場日漸移遠其閒空曠之地不下千有餘里悉屬腴壤內地流民並有私侵耕植者從前乾隆年間我皇考高宗純皇帝軫念八旗人眾分撥拉林地方給與田畝俾資墾種迄今人享其利今若仰循成憲將在京閒散旗人陸續咨送吉林以閒曠地畝撥給管業或自耕或招佃均足以資養贍將來地利日興家計日裕該旗人等可練習騎射其材藝優嫗者仍可備挑京中差使於教養之道實爲兩得著資沖阿松甯卽查明吉林地方如何酌蓋土銓草房俾資棲止此事經營伊始該將軍等盡心籌畫以副委任○辛亥 皇
后行躬桑禮○丙辰 上閱健銳營兵○癸亥改江蘇川沙同知

爲撫民同知劃上海縣二十二保南匯縣十七二十保各圖地漕

稅契等項銀米歸同知徵解○乙丑宗人府奏圖禁之覺羅富存

自戕身死緣由得旨依議此案富存於上年見另案被母呈送圖

禁之人有呈懇釋放者伊心懷憂悶自稱父母俱故不能放出勸

慰莫解因而自戕聞其情節亦覺可憫子於父母如有干犯重情

早經依律治罪其偶違教令經父母一時之怒送官監禁者情罪

本屬稍差伊父母呈懇釋放亦尙有不忍遽絕其子之心設伊父

母猝患危疾及衰老身故該犯羈身園土聞信後漠不關心是其

天良漸滅無可矜憐若尙知悼念天親哀思悔恨痛不欲生竟以

無人懇釋因而自戕或瘐死囹圄亦無以廣法外之仁著刑部會

同宗人府覈議並此外旗人民人經父母呈送忤逆之犯其父母

因病身故有情節類此者應如何訊問本犯酌理準情分別應禁

應釋詳議條款奏定後載入則例遵行尋議上得旨宗人府議奏宗室覺羅呈送子孫違犯分別圈禁年分各款朕詳加披閱多有未協如所稱初次呈送之犯查明素不能承歡膝下又復辭色不遜者請圈禁三年平日不能敬謹依順又向不安分者請圈禁六年賦性乖劣屢訓不悛者永遠圈禁等語不能承歡與不能依順及賦性乖劣雖措辭各異止係空言互較之有何區別若據此定議易於含混必致高下其手轉滋流弊嗣後宗室覺羅父母祖父母呈送子孫違犯者總令其將伊子若孫於何年何月因何事違犯之處據實書寫呈送到官將伊子孫按款審訊明確再按其情節之輕重大數之多寡以分別其圈禁之年限或三年六年或永遠圈禁嚴實辦理方足以昭平允又所稱永遠圈禁者經釋放後仍復干犯再經呈送發往盛京嚴加管束一節所辦亦殊非是圈

禁之法義同園土若永遠園禁釋放仍不知悔改再犯乃發往盛
京管束是較之在京園禁轉得閒散自便豈不失之寬縱此等案
犯著改發盛京永遠園禁以示懲儆至所請園禁之案若係獨子
遇親故暫行省釋令其治喪一條除三年六年者准其治喪外其
永遠園禁者既罔知孝道難復望其喪葬盡禮卽遇親故亦不准
省釋○辛未諭本日刑部具題河南省民人李成謀殺十歲幼孩
秦黑翠一本已降旨將李成改爲斬決矣因思定例將未至十歲
幼童幼女誘去強行姦污者照光棍例斬決自因幼穉無知橫被
姦污特設重典以防淫惡但被姦之幼童幼女並未致死卽將強
姦之犯問擬斬決至謀斃幼孩之犯仍照謀殺人本律問擬斬候
其閒輕重未免殊科此兩條例文孰先孰後當日定例時是否別
有意義著刑部詳細查覈將謀殺幼孩之案應如何分別年歲定

議斬決斬候之處參酌妥議奏准後載入則例遵行尋議嗣後謀殺幼孩除十一歲以上者仍照律辦理外其逞忿謀殺十歲以下者首擬斬立決若有圖財或因姦情事加以梟示加功之犯俱擬絞立決從而不加功者仍照本律杖流從之

五月乙亥以江蘇蘇松糧道兼巡之蘇州府歸松太道分巡○戊寅諭前月二十六日據武英殿御書處奏校刻 皇考高宗純皇

帝聖訓告成裝函呈覽朕詳細敬閱內字畫謬誤處甚多而謬誤最重者第二百四十四卷內 世宗憲皇帝廟號第十卷第三十一卷板心內 高宗純皇帝廟號各訛寫一字並未詳校刊正大

失敬謹之義校書如掃落葉魯魚亥豕豈能無一字之謬然在尋常書籍過尙可原至若 實錄 聖訓關繫 祖 宗謨烈所存冊府尊藏用垂永遠校勘應倍加小心况卷內恭書 廟號之處

更當如何敬謹朕每晨恭讀

實錄凡卷葉內前後書寫

廟號

微稱必皆字字恭閱如承

昭鑒近年來館臣及部院衙門有

譌寫

廟號者並曾降旨嚴懲且諄諄訓誡大小臣工自當共知

儆惕乃此次仍復漠不經心怠忽舛錯若律以大不敬之條大小臣工實不能當此重咎此次格外從輕懲治以昭炯戒所有承校此三卷刻本之校對官大理寺評事曹江內閣中書顧英工部員外郎彭鳳儀俱著革職發往烏魯木齊效力贖罪過六年後方准提奏候旨施行提調官編修陳鴻墀在館多年兼辦校勘著革職提調侍講姚元之到館未久著降爲編修仍罰俸二年總裁英和陳希曾二員係翰林出身校書悉所優爲乃不加敬慎厥咎較重亦應革職姑念素行勤勞著實降三級調用英和仍留南書房行走管理三山事務儀親王大學士慶桂二人係總理大臣因年老

不能照料周到著退去管理武英殿御書處差使儀親王仍罰職任俸三年慶桂仍罰俸三年至其餘誣錯各處內有盱眙二字稿寫日字偏旁查係原本錯誤以致刊校相沿此等處本無甚關係若係尋常書籍即可免議惟係 聖訓內字畫不能避免所有原充 實錄館各總裁內除慶桂英和二入業已分別處分德英劉鳳誥久經休致革職外董誥曹振鏞均著交部察議此外承校錯誤應議各員一併交部察議○加昆明湖廣潤靈雨祠 安佑普濟龍神沛澤廣生封號命每年春秋致祭○調景安爲戶部左侍郎以普恭爲理藩院右侍郎由內閣學士遷○調趙秉冲爲工部右侍郎初彭齡爲戶部左侍郎轉帥承瀛爲工部左侍郎○己卯以文孚爲內閣學士由副都統遷○戊子諭軍機大臣等溫承惠奏訪獲傳教惑眾邪匪嚴拏究辦一摺據稱灤州民人董懷信因伊父董太於

乾隆三十八年拜平谷縣人張榮爲師傅習金丹八卦教嘉慶二年張榮之子張思勝與董太等在密雲縣地方募錢修廟經官拏獲分別問擬軍徒未經究出傳教惑眾情事嗣董太故後董懷信復與余旺玉等商同惑眾斂錢令林自貴等分管八卦各宮經該州訪聞將董懷信等拏獲起出經符板片等件其所存入教男婦名冊乾隆年間有二千二百餘人嘉慶年間有二千九百餘人該督見將拏獲之犯親提嚴審等語畿輔重地有此匪徒倡立邪教惑眾斂錢自乾隆三十八年至今已及四十年見始破案此在初起之時不過三五莠民邪說煽誘如地方官留心查拏立時剪除淨盡原屬易辦之事乃漫無覺察聽其流毒數十年漸傳漸廣以致從教者五千餘人之多礙難全辦四十年以來一味因循姑息歷任大員均無良心實堪痛恨卽如三省邪教其初亦不過念經

做錢追黨與既多州縣官查拏不善遂至釀成亂階今董懷信等
爲首各犯俱經拏獲務須從嚴懲辦其教內分管卦宮及幫同傳
教緊要之人俱當按名查緝務獲依律重懲不可又存姑息若不
忍用刑何不削髮出家既登仕版當以國事爲重豈可存婦寺之
見至冊載五千餘人斷無悉數查拏之理若州縣辦理不善或胥
役人等仇扳賄縱紛紛滋擾必致激成事端著該督卽將首要各
犯迅速嚴拏重懲定擬具奏其僅止入教者卽照所請俟定案後
剴切曉諭收繳經符令出具改悔甘結仍存記姓名時時稽察有
犯卽懲伊等見首惡殄除羣知畏懼自可革面革心也其楊得坡
一犯已降旨諭知和甯富倭等密拏解直歸案辦理至直隸失察
之總督藩臬除乾隆年間者免究外其自嘉慶元年以後歷任各
員另有旨交軍機大臣會同吏部詳查具奏分別治罪將此諭令

知之○己丑召顏檢來京以景敏爲貴州巡撫積朗阿爲福建布政使遇昌爲甘肅按察使

由甘涼道選

○戊戌以王宗誠爲內閣學士

由詹事選

六月乙巳諭近日軍流人犯往往有於配所遣人來京呈遞封章之事實爲刁詐之尤不可不嚴行禁止罪囚如因本案屈抑到官申訴卽臨刑呼冤亦所不禁至呈遞封章條陳利弊此在平民尙當治其越職言事之咎若不法之徒身犯軍流重罪正所謂屏界遠方俾不齒於眾庶豈得復聽其率臆妄陳希圖僥倖嗣後軍流人犯有在配所遣人來京呈遞封章者無論所言是非虛實均應一體治罪著刑部酌擬罪名定例專條奏明載入則例遵行尋議軍流人犯在配所遣人陳遞封章條陳事務無論所言有無可採原犯軍流加一等調發遣罪無可再加卽在配所枷號六箇月若

呈遞密摺奏告人罪無論所控是否得實原犯流罪改發極邊煙瘴充軍原犯軍罪改發黑龍江仍照例分別當差爲奴原犯遣罪無可再加卽在配所枷號一年儻本案實有屈抑不赴內外風憲衙門申訴違例遞摺除本案准予審明更正外仍將該犯照衝突儀仗妄行奏訴例發近邊充軍如因呈遞封章另犯應死罪名仍各從其重者論從之○戊申諭軍機大臣等朕敬禮 神祇爲民祈福大內及御園多有供奉 諸神祠宇每遇祈報就近瞻禮以申誠敬惟水府 諸神如 天后 河神向無祠位凡遇發香申敬之時皆係望空展禮迺虔悃今擬於御園內添建祠宇著百齡親赴清江浦於崇祀各 神如 天后 惠濟龍神素昭靈應載在祀典者將 神牌封號字樣詳繕陳奏俟廟宇落成照式虔造供奉以迓 神庥○己酉諭國家自平定西域以來和闐葉爾

羌歲貢璞玉山川所產獻之上方亦猶任土作貢之義每歲所貢約踰四千斤擇其良者追琢成器其餘充物內廷歷年所積不可勝數新疆距京萬有餘里輦運勞費頗繁頓置無用何如損之爲益乎嗣後宜減其額歲貢以二千斤爲率惟歲額旣省該管大臣不得以下劣充數宜擇其溫潤精良者備制器之選無俾貨棄於地焉○乙卯以四川雅州改設府治增設雅安縣學將州學原額拔貢一名歸雅安縣仍設府學拔貢一名○丁巳溫承惠以讞獄失實奪太子太保褫花翎黃馬褂降二品頂帶降靈保三等侍衛以慶格爲直隸按察使由喀什噶爾幫辦大臣遷○壬戌諭吏部議處妄奏偷翦髮辮之御史榮椿議以降四級調用一摺從來訛言弗聽則人心自靖卽聖人不語怪之義從前乾隆年間直省訛傳有翦辮之事地方官紛紛查辦毫無證據仰蒙 皇考高宗純皇帝洞燭

情僞飭禁妄孚

詔旨甫頒浮言頓息閱今數十年來無復有傳

說此事者前日該御史以市井游談妄行入奏並請通飭查緝朕披覽時卽知爲子虛當交軍機大臣查詢伊無從指實惟自認冒昧糊塗降旨將該御史交部嚴議日來召詢吉綸據稱京城內外居民行旅安靜往來實無有敢造作妖言者可見該御史所奏毫無影響朕若誤信其言據以查辦豈不株累多人紛紛滋擾耶該御史陳奏謬妄本應照部議降四級調用姑念伊職係言官例得風聞言事若懲治過重恐以後實有關繫重大之事伊等亦相率緘默殊於言路有礙榮椿著降一級以六部主事用○甲子命八旗額駙職銜人員不准應試革退後仍准應試著爲例○己巳葺移駐盛京宗室廬舍並給地租銀贍贍之○大學士會同戶部議覆欽差侍郎阮元等奏吉蘭泰鹽務章程據稱吉鹽自招商承辦

以來動皆折本虧課。前據河東商人公稱：近年吉鹽滯銷，虧課半因潞引辦理周密之故。若復大興水運，必致侵壞潞網。如蒙停止吉鹽水運，情願做照長蘆之例，於河東額餘引外，再加活引八萬七千五百道。自嘉慶十八年爲始，每年得課六萬三千五百八十餘兩。等語。復查嘉慶十一年侍郎英和等奏請吉蘭泰鹽船准至磧口起岸，十三年原任陝甘總督長齡等奏吉鹽票運至河口而止。河口至磧口相去千里，而磧口則切近河東引地，恐防範稍疏，致累潞網。應酌中定地，示以限制。請於河口之南三百餘里黃甫川地方爲界，將磧口大使一員改爲黃甫川大使，移駐該處專司稽查所有吉鹽水販，止准至黃甫川而止。其自磧口商運鹽船仍照舊至河口起卸存倉。至吉蘭泰引地實因土鹽蒙鹽歉旺，不常未可限額行銷，致使商民並累。應請將吉引改爲活額，不必限以

定數俟此次十七年官引八萬餘引銷完之後十八年仍歸商辦
先課後鹽隨運隨徵無論引數多少資本若干皆聽商民自便等
語查嘉慶十一年晉省潞鹽復引招商將吉蘭泰鹽池一併收歸
官辦定額行銷原因從前潞商疲乏改行民運彼時吉鹽充斥晉
豫各省私商輿販獲利是以定議吉鹽潞鹽並由河東僉商行運
迨河東復引以來試行定價比舊額較增商人運辦潞鹽尙無苦
累而吉蘭泰鹽斤則因晉省復商疆界既清不能任意侵灌遂致
額引壅滯難銷商人誤運虧課招募不前上年復有官辦之議奈
售銷無地將來勒派虧那等弊勢所不免查河東鹽務未歸地丁
以前惟有乾隆二十二年四十七年因潞地被水請運蒙鹽接濟
其餘各年所產潞鹽均敷配運今吉鹽原定引地太原汾州等屬
六十四廳州縣既有本地土鹽及鄂爾多斯等處蒙古鹽價廉易

東華縣志卷之三
購吉鹽道遠值昂自無人售販若仍令吉鹽水道直至磧口既虞
侵占各省鹽綱若如該侍郎等所奏票運吉鹽以黃甫川爲界示
以限制仍歸商辦亦屬有名無實其改作活引徵解無常尤非覈
實之道其吉鹽引額八萬七千五百道應請照長蘆之例定爲餘
引以十八年爲始咨部領引交商行運吉鹽引地既歸潞商承辦
無須吉鹽銷販其吉蘭泰鹽池應請飭還阿拉善王瑪哈巴拉仍
聽該處人民自行撈運俾藩屬人等及口外貧戶足資生計其課
銀六萬三千五百八十兩應如所奏卽由河東商人按年完納吉
鹽旣已停運其阿拉善王瑪哈巴拉賞項應請停其賞給從之

東華續錄

嘉慶三十四

臣王先謙敬編

臣周瀚蕃恭校

秋七月癸酉諭本日刑部議奏酌定命盜各案應題應奏條款一
摺所議俱是依議行直省命盜重案應題應奏本有一定章程嘉
慶十三年復經飭交刑部酌改條款纂入例冊乃近日各督撫仍
係意爲遲速於尋常命盜案件亦多改題爲奏以致刑部速議之
案日見增多限期迫促若察嚴未周流弊滋甚至如本日衡齡具
奏山西保德州民人王恒心圖財謀殺幼孩王丑人子一案係謀
殺無服族孫照謀殺十歲以下幼孩例問擬斬梟本係例應具題
之案該撫業經專奏仍批交刑部速議自此次刑部議定條款著
通行各直省一體遵照嗣後各督撫於命盜重案專奏者俱著於

摺尾聲明此案係援照刑部議定應奏某條例得專摺陳奏朕批
交部議時該部察覈與原定條款相符卽行議覆僅有強行比附
率意改題爲奏者該部卽行參奏駁回仍令照例具題以符定制
○復改江南山東運河各工歸沿河州縣衛疏濬○戊寅復設雲
南緬甯等要隘土練一千六百名○己卯諭軍機大臣等百齡等
奏江境黃運兩河伏汎安瀾工程平穩一摺覽奏欣慰本年江境
黃河南經挽歸故道伏汎疊次長水仰荷 昊蒼默佑各工平穩
見在大溜奔騰東注悉走中泓自係海口通暢之效惟伏汎已過
秋汎正長該督等摺內所稱險工林立雖係習見之詞但大河兩
岸工段縣長其迎溜頂衝應行防護之處自必不少該督等務督
率道將廳營文武員弁倍矢敬勤小心防範趁此溜勢安穩之時
將一應隄防埽段認真培築以期有備無患本年秋汎再得保護

平穩則河底刷滌日深從此年復一年攔安工固即可永慶平成也勉之慎之再治河之道本係順水之性乃天地自然之利如清水之於黃水因勢利導以水攻沙水行地中歷來胥資其益後因措置失宜人事不盡拂其就下之性始分流旁溢以利人者害人目下黃河尾閭通暢大有轉機惟洪湖爲清水總匯其節宣橐籥前人妙用全在五壩啓閉得宜今五壩已壞其四惟餘智字一壩設遇湖水漲滿不足以資宣洩豈不束手無策且各壩底衝壞一經廠裂毫無鈐束之具不特下河一帶橫遭淹浸而清水不能收蓄則淮弱黃強倒灌接踵卽黃運兩河仍必日形淤墊此時大局應以修復五壩爲緊要機宜著該督等趁此各工無事之時卽會同籌辦除智壩外其仁義禮信四壩皆應以次修理完整亦不必拘定次序相度形勢何壩扼要先修何壩前此該督等曾有擬修

信壩之議連次摺內亦總未提及是否卽先由信壩興修務斟酌妥善全復前人舊規使湖水啓閉由我可以放心收蓄永資以清刷黃之利則湖治而河益治其理本一貫其效亦相因者也該督等卽悉心妥籌速辦爲要○辛巳諭昨內閣呈進永州鎮總兵武自珍遺本因令詳查舊式從前各大員身故呈遞遺摺者俱多將軍督撫內亦間有齎進遺本者原無一定程式外省題進本章例應鈐用印信拜發時並有行禮儀注本任之員已故則印信封固不當擅用且係何人代爲拜發其事全屬蹈虛嗣後內外大員應呈遞遺摺者仍准其照舊呈遞其遺本一項著槩行停止○戊子
上啓鑾秋獨木蘭○免經過地方額賦十分之三○甲午 上
駐蹕避暑山莊○乙未申諭直省督撫嚴查所屬私造非刑
八月壬子諭據百齡奏陳鳳翔於禮壩要工自四月開放後並未

親往察看迨至六月水已衝動壩下土舌椿水道廳節次稟報始往察看行至高堰仍不親身籌辦僅委遊擊陳岱堵築陳鳳翔復稽查陳家浦壩工遠赴海口至八月初二日始行赴壩並查河庫所發堵築禮壩工銀已至二十七萬七千餘兩之多仍未竣工清水大洩下河州縣被水成災據實奏聞等語陳鳳翔在河督任內上年王營減壩及李家樓各工漫口皆其貽誤所致嗣經節用百齡督率辦理將各漫口次第堵合朕念陳鳳翔亦隨同幫辦加恩賞給三品頂帶以觀後效乃陳鳳翔於禮壩要工仍不及早親往籌辦因循玩誤糜帑殃民此而不加懲創尙復何所做懼陳鳳翔著革職留於河工交百齡等差委令當勞苦差使其禮壩工程所用銀二十七萬餘兩本應令伊一人賠出但爲數過多卽責令賠繳亦未必能如數全完陳鳳翔著罰賠銀十萬兩其餘十七萬七

千餘兩交該督等照例覈辦所有江南河道總督員缺著黎世序以三品頂帶署理俟三年後如果實能稱職再行降旨補授○諭軍機大臣等百齡等奏通籌南河善後工需一摺內稱覈計江南江北地畝若按照靳輔舊議每田一畝出銀一錢計算可得銀三百一二十萬兩等語朕惠愛黎元與民休息從不肯議及加賦今令按畝出銀非加賦而何見既據該督等覈計善後各工不過需銀三百萬兩所有前議著即停止無庸籌辦其另摺奏准商捐輸銀四百萬兩並另片請將此項銀兩除搏節辦工之外尙餘銀一百萬兩解交內務府備賞等語南河善後工需淮商既懇請捐輸通盤估計三百萬兩已可集事商捐亦係民力但取足敷工用而止其額外多餘之數另解內務府殊可不必見在外省支撥款項部庫不敷每年尙由內務府撥給數十萬兩朕躬行節儉從無濫

費內務府亦無須如許賞項已降旨將准商捐銀止賞收三百萬兩其餘一百萬兩仍給還該商等以示體恤○癸丑諭軍機大臣等百齡等奏阜甯縣境內救生河一道於該處農田利賴且洩水保隄添渠運料均有裨益今淤塞日久應行挑復請先於河庫存款內撥銀估辦將來查辦蕩務有增出餘柴應行估價之款卽以此項分年陸續歸還等語國家度支自有常經取民亦有定制昨據百齡等奏籌辦河工善後工需援引靳輔舊議於江南江北按畝徵銀可得銀三百餘萬兩朕以事近加賦雖靳輔當日辦有成案然自康熙年閒至今百有餘載久未舉行小民難以家喻戶曉恐辦理諸多未便當卽降旨停止至本日所奏阜甯縣境內挑挖河淤此等河渠水利向係應用民力之事卽使民力一時不逮先行借帑興挑事後攤徵還款已屬國家惠民之舉今遽請支用帑

項雖此一處渠工不過需銀三萬餘兩而該省河渠水道似此應修者甚多若此例一開將來他處士民紛紛援此呈請又將何詞飭駁若槩予准行國家焉有如此帑項足供支用所謂惠而不知爲政矣所有阜甯縣挑河一款應仍照舊例借帑興修其如何分年攤徵歸款之處著該督等另行酌議奏請再降諭旨○甲寅以許兆椿爲工部右侍郎阮元爲漕運總督由工部右侍郎遷○丙辰上

自避暑山莊巡幸木蘭行圍○丁巳諭百齡奏禮壩急難堵合見在清水宣洩過多籌備減黃助清一摺據稱禮壩口門連日收窄後尙存寬二十丈壩門水勢斗急堵閉尙須時日惟有籌畫減黃助清以濟糧艘回空河臣陳鳳翔急於開壩於前遲於閉壩於後以致辦理棘手請旨嚴加議處並自請議處將不能匡正之河道黎世序一併議處等語本年李家樓壩工合龍之後河流順軌海

口深通黃河兩岸大隄又俱保護平穩溜勢直走中泓再能清水
暢出刷黃則全河積病漸除實爲南河極好機會乃陳鳳翔不知
守蓄清定見於本年四月下旬湖水並未旺長之時卽開放智禮
兩壩並不商之百齡迨開放至一月有餘禮壩土舌椿木俱已衝
動猶不親勘堵閉自李家樓回署之後數月安坐衙齋直至百齡
前赴山盱工次始往察看行至高堰距禮壩咫尺仍不親督籌辦
僅委之遊擊陳岱在彼堵築而陳岱任意延緩以致清水大洩下
游被淹禮壩口門愈刷愈深急難堵閉此事陳鳳翔怠玩乖舛貽
誤全河大局殊堪痛恨前日百齡具奏壩工情形並未將陳鳳翔
指參經朕看出降旨將陳鳳翔革職罰賠續又責令查辦災務今
伊罪狀昭然視革尙不足蔽辜百齡於奉旨之日傳旨將陳鳳翔
在禮壩工次枷號兩月示眾如禮壩剋期堵合再移往他工限滿

疏枷發往烏魯木齊效力贖罪俾通工大小員弁共知聽河大員一經貽誤尙如此重懲庶怵目儆心羣知炯戒已革遊擊陳岱派辦要工心存延玩著在工次枷號四箇月滿日發往伊犁充當苦差百齡辦理河工事務盡心籌畫此次自請議處原可寬免但伊不早將陳鳳翔參奏至事機已誤始行查參究屬遲緩百齡著交部議處黎世序在淮揚道任內見總河開放鹽壩錯誤不能力爭匡正亦著交部議處伊見在署理河督當以前任爲鑒於一切河工緊要機宜認真講求知懼知懼勉副職守至此時回空糧船業已南下黃水高於清水卽趕緊堵閉禮壩設法挑通亦未必能使清水暢出敵黃所有百齡奏請開放祥符五瑞閘以資減黃助清之處著卽照所請會同黎世序迅速妥辦其下游被淹各處並著百齡迅速派員查明撫恤○戊午諭戶部奏查明各省積欠錢糧

及耗羨雜稅等款銀兩數目一摺直省丁賦錢糧皆國家惟正之
供每歲量入爲出以給俸餉諸大端度支所繫國有常經戶部具
報月招毫無額外支銷此中外所共知者且內務歲用所需不特
從不取之部庫歷年以來每將內務餘款撥給戶部應用貶不下
數十萬有將及百萬者而覈計部中正項錢糧積欠竟至一千九
百餘萬兩之多屢經飭催報解寥寥此實歷任直省大吏催徵不
力所致除單內奉天山西廣西四川貴州五省皆年清年款並無
積欠雲南省僅有積欠五百餘兩均無庸議外其安徽山東積欠
各多至四百餘萬兩江甯江蘇積欠各多至二百餘萬兩疲玩尤
甚該省督徵不力之督撫藩司均著嚴行申飭其積欠自百餘萬
數十萬至數萬兩之福建直隸廣東浙江江西甘肅河南陝西湖
北湖南等省各督徵不力之督撫藩司均著傳旨申飭自此次奉

旨之日著督率所屬實力催徵毋任延玩拖欠一經徵有成數卽行報部撥解並著戶部於每歲年終將各該省積欠原數若干已完若干未完若干詳悉開單具奏以報解之多寡分別飭議以重國課而昭覈實○乙丑安徽巡撫錢楷卒于祭葬○以胡克家爲安徽巡撫陳觀爲江甯布政使楊護爲浙江按察使

由江蘇淮海道遷

九月庚午朔戶部議覆署山西巡撫銜齡奏稱大學士會同戶部議覆侍郎阮元奏吉鹽引額八萬七千五百道准令河東商人認辦卽以吉鹽六十四廳州縣行引之地歸於該商一體行運潞鹽等因查河東鹽池僻處省南所食蒙鹽土鹽之陽曲等六十四廳州縣遠居省北今以河東之商復令兼辦無論道險途長成本必貴而民間素食賤鹽斷不能強令食貴懇將六十四廳州縣向食蒙鹽土鹽之地仍循其舊所有潞鹽加增餘引八萬七千五百道

歸於見行潞鹽引地行銷又原請加增活引實緣見行引地暢滯不一若令運商按地一律酌加則暢行地方不患難銷而滯銷之地必致賠累所有見加餘引請察看何處暢銷趕緊配運課額仍無流弊至甯夏道既不辦鹽務無庸再兼鹽法此外磴口運判鹽大使吉蘭泰大使河口大使等四缺應俟吉鹽運竣卽行裁撤等語應如所請從之○甲戌給移住盛京宗室每戶田三十六畝○乙亥諭廣東按察使溫承志前在道員任內隨同總督百齡辦理洋盜甚爲出力經朕擢任臬司並加恩賞戴花翎此次前來熱河陛見召對數次見其人頗明白能事方資任用陞辭時令其順道看視伊兄溫承惠茲據溫承惠奏伊弟在伊署內患病身故殊爲可憫溫承志職係臬司例無應得卹典其子溫啓熊係候選員外郎著加恩俟服闋後以員外郎卽用○嗣趙宜喜爲廣東按察使

以諸以謙爲河南按察使

由開歸道遷

○丁丑

上駐蹕避暑山莊○

諭軍機大臣等據汪志伊等奏審訊已革護總兵事副將項統尙無畏葸玩縱情事惟緝捕不力請旨在海口先行枷號三箇月等語所辦非是項統率領兵船在所轄洋面巡緝因半年之內未據追獲一船報擒一犯以致吳屬匪船在境疊劫前經該督等參奏將該員作爲兵丁責令緝捕自贖因恐該員尙有玩縱情事當經降旨交該督等嚴審該督撫審辦此案自應訊明罪狀按律問擬儻該革員情罪較輕亦不妨據實聲明革職責令效力今該督等率請將該革員在海口枷號三月試思項統以副將護理總兵係屬專閫大員豈微末弁兵可比督撫統轄營伍其標下弁兵遇有獲譴枷杖之事伊等可以自行辦理至於大員閒有枷號示儆者則必出自特旨並無常例豈臣下所可輕擬此端斷不可開恐廢

文員陵轍武職之漸汪志伊等原摺發還仍交該督等將項統獲
罪情節覈其應得罪名按律定擬具奏○壬午 上自避暑山莊
回鑾○丙戌復廣東南雄府爲州仍裁保昌縣增設嘉應直隸州
州同吏目學正各一員○戊子 上還京師○改江蘇海州營遊
擊爲參將並移駐增設各弁兵○甲午以慶桂年老罷軍機處並
領侍衛內大臣仍爲內大臣命松筠仍在軍機處行走○以何銑
爲甘肅布政使盛惇崇爲江西按察使由陝西
糧道遷
十月丙辰以陳希曾爲內閣學士降調戶
部侍郎○丁卯調恭阿拉爲禮
部尙書福慶爲兵部尙書

十一月辛未諭德文等奏據四川崇慶州十一歲女子余酉州以
懇釋赦伊父余長安等情具稟請旨遵辦一摺四川民人余長安
前因控告譚飛農等開賭私宰等事審屬虛誣問擬軍罪發遣湖

北覈其情罪尙非常赦所不原該犯到配已閱九年之久見有父母年逾八旬無人侍養今伊女年甫十一痛念伊父遠遺祖父母暮年缺養不遠數千里匍匐來京申訴其情甚爲可憫余長安著加恩釋放回籍○佛爾卿額以疾免以景安爲理藩院尙書調成甯爲戶部左侍郎以文孚爲刑部右侍郎由內閣學士遷○壬申諭國家明法定制辨上下別等威尊卑之分綦嚴定例民間詞訟先赴州縣衙門呈控州縣官聽斷不公則由府道司院以次申訴如實有冤抑重情准於刑部都察院衙門呈訴奏明代爲申理以通下情以定民志典至善也至封章奏事則各有一定職分內而九卿臺諫外而督撫司道方准呈遞奏章下至庶尹末僚尙不得越職言事况齊民乎朕廣開言路嘉慶四年曾有封章言事卽以原封呈覽之旨原以在官而言防壅蔽而達民隱非謂民間尋常訟獄及

無稽浮言皆可直達朕聽也乃近日人情險詐萬端於瑣屑訟案不向該管官吏控訴輒匿名告訐以期封奏上聞甚至將呈詞封固投遞挾制接受官員不敢拆閱原封入奏此內罪囚盡役廩隸役夫比比皆是蔑等冒尊輟之道旁叩闡衝突儀仗者其情節尤爲可惡若不嚴設厲禁其爲害於人心風俗者甚大著交刑部覈議嗣後如有捏稱重情封遞呈詞者其所控得實仍應作何治罪若所控虛誣應如何加重治罪其罪犯封遞呈詞者再如何加等治罪分別擬定條例奏准後頒發直省交各督撫分飭所屬州縣出示廣行曉諭俾愚賤之人共知儆戒以懲刁健而肅紀綱尋議嗣後軍民人等控訴事件俱令向該管官露呈投遞儻有將呈詞封固者卽令本人開具控情略節一併進呈如所開略節與原呈相符而所告又得實者照衝突儀仗妄行奏訴例加一等發邊遠

充軍若所控虛誣除罪應斬絞立決者無可復加外原犯斬絞監候秋審應入緩決者改爲情實應入情實者改爲立決原犯軍流遣罪無論已未到配卽照本年議定在配遣犯遣人遞摺之例分別治罪如係應擬笞杖枷號徒罪者卽發極邊足四千里充軍儻呈遞封詞之人不肯開寫控情略節卽行擲還無庸具奏如已開具略節接收官員不爲具奏別經發覺者卽將從前接收不奏之員照應奏不奏例議處從之○癸酉諭乾隆六十年正月十五望月蝕是日例設筵宴仰蒙 皇考高宗純皇帝特命移改宴期以示謹懍 天戒之意明歲正月十五日亦值月蝕所有年例節次應設筵宴自當恪遵 成憲酌改日期用昭寅畏上元前一日家宴阿哥王貝勒著照舊舉行十五日仍照例穿蟒袍補服屆申時卽便換常服其正大光明殿筵宴外藩及王公大臣著移於十六

日辰時皇后內廷家宴著移於十六日未時小宴廷臣著移於十七日未時十七日與宴之王大臣著穿蟒袍補服餘俱常服○戊寅諭軍機大臣等松筠等奏查訊陳鳳翔呈訴大槩情形一招松筠等奉命前往南河請訓時經朕面諭務當秉公查辦不得以陳鳳翔業已獲罪稍存偏見今松筠等到彼陳鳳翔呈訴華蕩營柴束情弊松筠等卽先派員詳細查究據實參辦毫無徇實屬公正可嘉華蕩營所收柴束原以備築壩搶險之用前百齡奏稱所採蕩柴俱係堅麤適用今查明柴質微溼且夾帶雜草充數而斤重大相懸絕是原奏所稱節省銀十餘萬兩全係捏詞謊報朱爾賡額以少報多妄稟邀功轉將據實稟訴之把總錢永勝摘去頂帶勒令裝迎實屬任性妄爲松筠等面詢該道已自認不無通融情節支離顯有弊竇江南鹽巡道朱爾賡額著革職拏問交松筠

等提同應行質訊之員弁兵丁等詳加研鞠有無從中國銷情弊
徹底根究嚴行懲辦其隨同督辦蕩柴之南安府知府韓桐著交
順天府查明咨行直隸山東沿途派員迅速押赴清江歸案質訊
審明後將百齡因何被其蒙蔽率行勘定章程之處一併附參若
百齡竟有通同舞弊之事卽由四百里嚴參不可姑息至啓放智
禮兩壩緣由據松筠等奏稱檢查案卷黎世序因上年陳鳳翔奏
定湖水長過一丈三尺酌啓一壩再長再啓本年四月下旬湖水
已逾一丈五尺稟請開放智禮兩壩原稟已經百齡批示覈與陳
鳳翔原呈所訴相符等語黎世序稟請開壩百齡既有批示其原
批之稟自在道署存案著黎世序呈出百齡所批是何詞語與陳
鳳翔批准日孰先孰後著松筠等逐一查明秉公覈辦本年智禮
兩壩彼時是否應開開放後陳鳳翔堵閉遲緩又於獲罪後辨訴

其咎固屬難追若百齡前曾批准迨參奏時並不聲敘全行議退
於人含混入奏亦著據實參奏松筠等審案完竣後卽前赴高堰
下河一帶將派令履勘之高堰隄工河道及下河水利悉心察訪
斟酌盡善定議具奏○辛巳諭本日內務府議奏長蘆鹽商義和
泰懇借運本銀兩一摺已依議行矣摺內引照乾隆五十一年商
人王世榮請借帑銀原案敘稱奉 高宗純皇帝特旨准借措詞
殊未審慎各部院奏章關繫重大典禮書寫 廟號 尊諡呈進
時朕必敬奉展觀倍加虔肅若尋常事件輒引用書寫轉涉輟廢
嗣後各衙門具奏尋常事件凡引用乾隆年間以前舊案但載明
年分將奉 旨字樣三摺書寫卽足以表示敬恭遇有典禮奏章
必應恭引 廟號 尊諡者方准敬謹書寫以昭慎重○諭奕綬
於身後追封輔國公係屬格外加恩自應作爲未入八分公宗人

府於禮部行查時無難覈定咨覆乃節次咨詢該衙門明知應照未入八分公之例輒稱是否入八分公抑係未入八分公難以懸擬無憑覈覆等語殊屬顛預推諉迹涉瞻顧管理宗人府王貝勒等著各罰職任俸半年不准抵銷所有該部奏請應給奕綬蓋造墳院銀兩著卽照未入八分公例給與嗣後宗室如有身後追封公曾者俱作爲未入八分公著爲令○萬承風以疾免轉戴聯奎爲兵部左侍郎以吳烜爲兵部右侍郎由通政使遷○乙酉建直隸永

定河

河神廟加封

安流衍澤之神頒

御書扁額○己丑以

英和爲內閣學士

總管內務府大臣遷

○甲午諭鄉炳泰等奏武清縣民

人姚翰清等一百餘人公遞呈詞爲已革發遣知縣孫成裘指責

贖罪一摺本日朕召見鄉炳泰等並據面奏伊等於接收呈詞後傳集該鄉民等詳細詢問僉稱孫成裘居官清正愛民有素茲聞

其獲罪達戍不忍坐視是以捐貲代爲贖罪其情詞出於至誠等語孫晟喪在武清縣任內克孚輿論閱呈內臚舉各事蹟該鄉民等同聲愛戴似無虛捏情事但該革令犯事緣由係因縣民高六壽斃韓貴興一案初驗本無錯誤繼因審無確供詳請覆檢致爲忤作張寬及伊門丁書吏串通受賄蒙蔽該革令被欺枉聽部議褫革發遣實係罪有應得著鄒炳泰等傳到該鄉民等明白曉諭以伊等同心好義感戴去任之官其意亦屬可嘉惟孫晟喪平素官聲雖好而斷獄錯謾則朝廷執法懲辜不能寬宥若竟徇所請此後官員獲罪者或詭託效尤其弊亦不可不防令該鄉民等將代孫晟喪贖罪銀二千兩卽行領回勿許瀆懇至孫晟喪獲罪遣戍並無貪酷情弊其詳請覆檢亦尙有愼重民命之心將來到戍三年期滿該管大臣奏請朕覈其案情亦必降旨釋回茲念其平

日居官尙好著加恩於到戍一年半卽予釋放回籍國法民情並行不悖該鄉民等亦當共知感激若再行妄訴卽當治以應得之罪○乙未諭松筠等奏詳查葦蕩船務營制情形請仍循舊章一摺葦蕩營採辦柴束及船務營兵額官制百齡新定章程旣多窒礙難行之處松筠等請交河臣詳酌議奏此事計關久遠恐黎世序一人智慮未周著松筠初彭齡於履勘圩堰下河回至清江時會同黎世序詳悉參酌或仍循舊章或量加損益妥議章程具奏松筠等再由邵宿一路查看運河開座順道回京黎世序俟松筠等啓程後再行來京陛見○諭松筠等奏查訊已革江南河道總督陳鳳翔呈訴各款審明定擬一摺此案陳鳳翔所呈蕩柴弊混一款見經松筠等查明朱爾賡額經百齡委辦蕩務捏詞邀功飾增採之虛名多糜工本無濟實用百齡被其欺蒙率以節省帑銀

數十萬輕改章程冒昧入奏已有失察之咎至啓放智禮兩壩百齡於黎世序稟請開放時批詞內有豫籌減洩甚合機宜之語卽與陳鳳翔批准啓放者無異迨後見湖水宣洩過多欲全行談過於人具奏時並不與陳鳳翔合詞請罪輒將陳鳳翔嚴參僅自請議處而於曾經批准情節又匿不聲敘且所參陳鳳翔自李家樓工竣後安坐衙齋數月未赴工次一節見亦查訊在工各員事屬虛誣百齡陳奏不實意存欺飾較之失察屬員其咎更重百齡著革去太子少保銜拔去雙眼花翎准帶單眼花翎降爲二品頂帶仍交部嚴加議處陳鳳翔於獲罪後遣人赴訴若所控虛誣自當加重治罪今蕩柴弊混情形伊本擬工竣參奏因革職呈控全實餘亦說非虛捏陳鳳翔著卽日疏枷仍照前旨發往烏魯木齊效力贖罪朱爾廣額督辦蕩柴虛糜工本苦累兵丁復飾詞蒙稟倚

勢作威著在葦蕩營枷號三箇月滿日發往伊罕其隨同辦理蕩
柴之南安府知府韓桐著革職按律杖徒參將王福守備安鵬均
著革職俟賠項繳完照例免罪開復縣丞墨封王元伊知縣劉平
驕侯維藩俱著交部議處黎世序楊護徐忻先於委查蕩柴情弊
時草率結案亦著交部議處所發工本銀兩除變價歸款外其無
著之款照松筠等所奏按成公賠勒限追繳左營未運蕩柴並著
該督等速籌迎交各廳以免耗折餘均著照所請完結尋議百齡
革職黎世序等降三級調用得旨百齡加恩改爲革職留任黎世
序等降四級留任○丙申論史從志著卽凌遲處死李氏著卽處
斬其史監科一犯收弟婦爲妻按律本應絞決但律又載姦兄弟
妻和者絞決原以重倫紀而杜邪淫今該犯收弟婦李氏爲妻會
與其弟李泳年商明並告知地保覈其情節實係鄉愚不知例禁

並無先姦後娶情事若與兄姦弟妻者一律絞決未免無所區別
史靈科著改爲絞監候入於明年朝審情實嗣後有似此兄收弟
妻審明實係鄉愚無知誤蹈瀆倫之罪者俱照此案辦理餘依議
○丁酉諭伯麟等奏因公議革知府請捐復留滇補用一摺所奏
非是向來官員因公處分部議上時有旨令該督撫出具考語送
部引見原因事屬公過引見時朕察其才具年力如尙堪錄用或
仍予原官或降等改補並非悉照部議罷斥者若被議恩准引見
之員先行自請捐復是不以甄別人材爲重將來議革議降者人
人希冀捐復或虧帑朘民豫爲蓄貲地步殊與政治攸關宋思楷
著不准捐復仍令該督撫出具考語送部引見再降諭旨○免雲
南防守外夷之思茅等二廳縣所屬土司額糧

十二月庚子朔諭東三省爲我朝龍興之地因吉林黑龍江二處

地氣苦寒從前定例將獲罪人犯發往該處給兵丁等爲奴昔時人數有限到配尙易於管束近緣廣東福建等省辦理洋盜會匪等案將夥犯情重者俱照擬發往人數積至數千名以外該處兵丁歲支錢糧本有定額止敷養贍身家今發給爲奴者日增日眾竇令收養其生計必愈形苦累且該處習尚淳樸此等爲奴之犯大率皆兇狡性成百千羣聚故習未悛甚或漸染風俗於根本重地尤屬非宜甚有開繫著刑部卽速詳查該二處見在業經到配爲奴之犯共有若干此內覈其在彼年久者量減軍流分別改發煙瘴極邊等處其到配未久未便減等者卽著改發新疆並著改定條例嗣後各省案犯有例應發該二處爲奴者量爲區別酌留數條其餘洋盜會匪人數較多之案均酌擬改發新疆及煙瘴等處奏明條款纂入律例遵行○庚戌諭朕恭閱 皇考高宗純皇

帝實錄內載乾隆二十九年 諭旨各省遇有子孫蔑倫重案令該督撫於審擬定讞後一面奏聞卽一面正法原因該犯情罪重大不使稍稍顯戮但事關重辟其中情偽多端亦不應輕率完結卽如廣東遂溪縣監生梁舉朝毆死陳國英之母張氏一案初經該縣妄斷屍子陳國英殺母及該督蘇昌覆審始究出梁舉朝自行毆死狡稱陳國英搭斃實情幸而獄無枉縱嗣後各省如遇此等重案不可不倍加詳慎欽此仰見 皇考慎重民命明允用刑之至意朕綜理萬幾每遇刑辟重案必再三詳閱始行報可原以人命至重不敢稍存草率之心近因各省奏請卽行正法批交刑部速議之案過多特降旨令刑部分別應題應奏章程飭交問刑衙門遵辦惟恐直省督撫因犯人罪干重辟率以未便稍稍顯戮爲辭動輒奏請卽行正法不將案情詳審夫小民訟獄其開情僞

百出在尋常命案尙應聽斷平允况倫紀攸關之案尤應細心鞫
勘設州縣官少存大意或有富豪勢惡之徒逞兇致斃人命轉行
賄勒供陷死者子孫於極典因以滅口使其家申理無人在督撫
僅憑地方官詳報加勘具奏及交部臣覈議亦止據案照覆擬定
爰書卽題奏達於朕旃而奏當之成亦遂無從指駁試思子孫果
干蔑倫大罪自應立置重典設其中有如從前廣東梁舉朝之案
不加詳審致令死者含冤兇徒漏網則覆盆之枉豈不足召陰陽
履沴之災所關殊非淺鮮嗣後各督撫遇有蔑倫重案務須親提
人證再三確審以成信讞毋僅憑州縣供詳輕率定案以期無枉
無縱仰體朕欽恤惟刑之意○裁江南韋務營參將○辛亥諭御
史王澤奏請刊刻治河方略以重河防一摺我朝 列聖相承重
熙累洽制度典章成書大備方今寰區康阜庶績咸熙惟大河修

防爲豫東江安數省民生利賴兼之東南轉漕運道攸關比年以來議濬議築工作頻仍迄未得一勞永逸之策敬念從前 聖祖仁皇帝軫念民依曾 親莅淮揚指授方略 世宗憲皇帝特命館臣繕錄成編 高宗純皇帝鑒古準今亦屢申 睿訓詳授機宜百餘年來 神謨莫定 典法昭垂著有成效今河工每有籌策盈庭集議鮮有能練習舊章通曉全局者應詳稽 成憲彙載簡編俾原委昭然用爲萬世遵守著交文穎館敬司其事卽行文在京各衙門及河道總督溯自康熙年間以來凡歷次河工所奉 聖諭及大小臣工條議足資參考者俱詳查繕錄造冊移咨該館並令江南河東河道總督將河湖隄堰等工分晰繪圖附冊咨送該館俟各項冊籍略備卽奏請簡派總裁再酌擬凡例遴選纂修各員詳慎修輯進呈後刊刻頒行以垂久遠○壬子恭阿拉以

疾免封三等公爵以鐵保爲禮部尙書轉凱音布爲吏部左侍郎
湖成甯爲吏部右侍郎以玉麟爲戶部左侍郎由內閣學士遷○金光悌

卒以祖之望爲刑部尙書

服闋侍郎

○邵自昌以病免調王集爲左都

御史以潘世恩爲工部尙書轉周兆基爲吏部左侍郎調卬承瀛
爲吏部右侍郎轉許兆椿爲工部左侍郎以茹棻爲工部右侍郎

盧蔭溥爲內閣學士

由通政使遷

○己未諭御史常文等奏請申禁庶

民呈遞封章以歸畫一一摺朕前因近日人情險詐每以瑣屑訟
案封詞投遞挾制官員代爲陳奏特降諭旨嚴行飭禁令刑部分
別定罪以懲刁風刑部於議奏條例內有令本人將呈控事件開
具略節一併進呈如接收官員不爲具奏照應奏不奏例議處一
節所議本未允協國家定制臣工奏牘或露章上達或密封進呈
原爲職應言事者而設至小民身有冤抑分當具呈控訴聽候審

辦內外大小衙門法制相維何敢不爲申理若尋常詞訟皆欲直達朕前或妄議建言希榮干進此等狡黠之徒必應嚴罰示懲所謂天下有道則庶人不議也今若令其開具略節卽爲呈遞奸民巧詐百出其所開略節未必皆與封詞符合接受官無從查考轉致案無鉅細悉以上聞仍不足以杜刁玩而清訟獄著申諭文武臺諫各員嗣後如有民人呈遞封章者接收之員一面將所遞封章具奏一面卽將該犯鎖拏先行送交刑部押禁附於摺內陳明朕查閱封章覈其案情輕重或照封遞呈詞新例治罪或詞語悖謬再加等治罪交刑部分別懲辦所有刑部前議開呈略節一條著卽刪除○內大臣三等公恭阿拉卒贈太子太保賞治喪銀一千兩○庚申諭百齡性情褊急遇事專尙嚴厲同官每失和衷是其氣質之偏然平日辦事認真不避嫌怨能使屬員畏憚故剔弊

歷任所至著有成效前在兩廣總督任內值地方廢弛洋匪不靖
百餘銳意整飭嚴參關茸文武員弁督率舟師人人用命以次殄
除逋寇洋面肅清迄今數年海疆甯謐其功在人耳目嗣伊因病
回京補用京職值江省河防數處愼愼特簡放兩江總督百齡莅
任後稔知河工積弊先將貽誤劣員嚴行參劾親駐工次將王營
減壩李家樓各漫口剋期堵合並分飭河員慎守隄岸本年黃流
順軌伏秋大汛獲奏安瀾各軍船重運回空亦悉臻迅速此又其
實心任事之效昨因陳鳳翔控訴各款特派松筠初彭齡前往查
辦所查葦蕩營弁混一事係由朱爾賡額捏稟邀功以少報多百
齡委用非人受其蒙蔽此其過之小者至開放禮壩一節今年四
月湖水盛漲已逾定誌聚世序稟請宣洩百齡與陳鳳翔先後批
准原無錯誤迨後堵閉遲緩將壩基衝壞洩水過多則係陳鳳翔

辦理貽誤非百齡之咎百齡於參奏陳鳳翔摺內亦曾自請議處但未將前此曾經批准開放一節詳悉聲敘此則近於同護隱飾以致噴有繁言其咎較重朕當將百齡降摘翎頂革去官銜交部嚴議部議上時加恩改爲革職留任仍限以八年無過方准開復如八年內再有過愆尙當從重治罪朕於百齡功過權衡斟酌罰當其辜並以封疆重任愛惜人材實毫無曲徇於其間此衷自選天鑒乃本月初間先據太常寺少卿馬履泰奏請將百齡應得處分別交廷臣覈議其意不過欲罷斥百齡以快失意人之私忿旋又據御史吳雲具摺參奏以百齡性情陰險操守平常等詞請旨查辦伊二人既有此奏自當徹底詳查以憑覈辦百齡受恩深重如實有貪私劣蹟雖從前著有勞績亦不能掩覆其短稍從寬宥隨卽降旨諭令松筠等嚴查密訪據實糾參本日松筠等覆奏據

稱道旨查訪吳雲原摺所參皆確無確據良由毀譽之詞出諸恩怨之口伊二人實不敢以無據之言擅聽等語松筠等二人平日辦事公正眾所共知今其所言如此豈能據馬履泰吳雲二人空詞搖惑卽將百齡斥辦耶吳雲身係言官尙得以風聞言事爲詞至馬履泰見係卿員非言官可比似此妄行瀆奏本應加以懲處姑念其年老糊塗亦著從寬免議總而言之百齡實屬有爲之臣朕非虛言所能搖惑之主百齡將來能承承恩澤與否朕不能保看其造化此時不能再加重譴以遂讒譖之奸計所有辦理此事前後緣由特明白宣諭俾中外諸臣知之○壬戌緩徵安徽全省積年通賦○是歲朝鮮暹羅來貢○會計天下民穀數各省通共大小男婦三萬三千三百七十萬五百六十名口各省通共存倉米穀三千三百五十八萬八十五百八十五石五斗一升七合七

夕